

EBBALUWA OPAWULO EGIYAWANDIKIIRE OTITO Enyanjula

Eenu moiza oku bbaluwa eina oPawulo egiyawandikiire bantu neye tikanisa. Ebbaluwa egindi eisatu niigyo ginu: OTemuseewo esooka, n’oTemuseewo eyokubiri, n’oFirimooni. Ebbaluwa eenu oPawulo yagiwandikiire muweererya omwinaye ogubeetanga bati Tito, eyamubbeeranga okukola emirimo gy’obuweererya oku kizinga e Kuleete. OPawulo kyezyeka okubba kiti, yawandiikire ebbaluwa eenu kiseera ky’akati w’omwanka 63-65 nga bamalire okubyala oKurisito.

OPawulo ayezya okubba nga yabbaire n’ensonga enkulu isatu omu kuwandiika ebbaluwa eenu. Ensonga esooka, yabbaire kumusisiitira okwekubbembera amakanisa agabbaire oku kizinga ky’e Kuleete. Eyokubiri, kumulungamy mu ngeri y’okulonda n’okwegesya abeekubbemberi b’amakanisa omu kitundu ekyo. Mwekyo yamuwaire okulungamy okufaanana nakudi okuli omu bbaluwagye eeri oTemuseewo. N’ekisembayo asonzola engeri abaikirirya egibasaaniire okwebityamu nga beewala okubba ab’eitima, era ab’ensaalwa era n’empaka egy’ekisirusiru egireeta okwawukana omu kanisa. Mwekyo akalaatira abeekubbemberi b’amakanisa

okwekeenenya omutindo ogwetaagisya
abeekubbemberi okubba nagwo.

Engeri egibyecaanamu

1. Okweyanjula 1:1-4.
2. OPawulo asisiitira oTito okulonda abeekubbemberi abatuukiriire 1:1-16.
3. Era amusisiitira okwegesya abantu okubbaawo omu bwomi obutuukiriire 2:1-3:11.
4. Ebibono ebisembayo 3:12-15.

Okwemanyikisya

¹ Nze oPawulo omuweererya wa Kibbumba, era omutume wa Yesu Kurisito, ogubatumire mbiraabbe eeri abalondemu ba Kibbumba okwikirirya okutuuce, era mbamanyikisye amazima agatuuca abantu omu kugondera oKibbumba. ² Okwikirirya n'amazima ago byeigikire ku kusuubira bwomi obutawaawo, oKibbumba atayezya kubbeya, obuyasuubizire okuzwa eira einu. ³ Ekiseera ekituuce owekyatuukire, obwomi obwo n'abulagira omu bibono, era ebibono ebyo niibyo ebiyankwatisirye mbiraabbe eeri abantu, ng'oKibbumba oMulokoli waiswe oweyalagiire. ⁴ Nkuwandiikira iwe Tito omwana wange onanyerenyeere omu kwikirirya swenaswena okutuli nakwo. OKibbumba oIte-waiswe n'oKurisito Yesu oMulokoli waiswe bakukwatire ekisa, era batyo bakuwe eidembe.

Omulimo gwa Tito omu Kuleete

⁵ Nakulekere omu Kuleete nga ntaka otereerye ebyo ebyetaagisya okuteereerya, era oteekewo

abeekubbemberi b'amakanisa mu buli kibuga, ng'owenakulagiire.

⁶ Oyo ogwolonda asaaniire okubba ng'abulaku ekyokumunenya, era ng'ali n'omukali moiza. Abaanabe bali n'okubba baikirirya, era nga tibababalira mwabo abeekolakolania olw'eiralu, ooba mwabo abajeemu. ⁷ Ekyo kityo olwakubba omulabiriri ng'owaali muweererya wa Kibbumba ali n'okubba ng'abulaku ekyokumunenya, nga tiyeekudumbalya, nga tasunguwala mangu, nga timunywamwenge, nga timukambwe, era nga talulunkanira ebyobusuni. ⁸ Wazira, ali n'okubba ng'amaite okwaniriza abageni, era ng'ataka abakola ebisa, nga yeegendereza, nga atuukiriire, nga mweru, era nga yeefuga omu bintu by'amasanyu. ⁹ Ali n'okubba muntu agumira oku bibono eby'amazima ag'enjegesya yaiswe ng'owebabimwegeserye, kaisi ayezye okusonzolera abantu enjegesya entuuce, era n'okulaga engeri abo abagyakanisya egibagotamu.

¹⁰ Waliwo bangi abajeemu, abakola gwa kulaaduuka nga batumula ebya bubbeyi, eino eino abo abakoba bati abaikirirya kibeetaagisya okusengererya eiteeka ly'eKiyudaaya erya kukomola. Batumula ebinambulamu nga bataka abantu babiikiriryemu. ¹¹ Abo basaaniire kubasirica, olwakubba bagotesya buli moiza abba omu kisito ekibaingiramu nga beegesya abantu ebitaiza olwa kutaka okusuna empiiya

omu ngeri embiibbi. ¹² Omoiza oku banyere abo, era nga yeeyeta naabbi waabwe, yakobere ati, “Ab’oku kizinga ky’e Kuleete buliijo omu kubbeya beekansa; bisolo ebya kabbikabbi, era baluvu, era bagayaali.”

¹³ Neye era, ekiyakobere kituuce. N’olwekyo, oli n’okubanenyanga n’amaani, kaisi oolwo babbe n’enjikirirya entuuce ezwa omu nseega ensa. ¹⁴ Nga tibateeka emyoyo gyabwe ku bifumo by’eKiyudaaya ebyobubbeyi ooba ku mateeka abantu abo abagaana amazima egibagunjire-obugunji.

¹⁵ Eeri abalongoole omu myoyo, buli kintu kibba kirongoole. Neye eeri abo aboonoonoki omu myoyo n’abataikirirya, mwibo timubbaamu kikenene naire, olwakubba tobona ng’obuwongo bwabwe n’ebiseego byabwe bibba byayonoonekere ira. ¹⁶ Omu b’engeri eyo mutira okubbaamu n’abo abeetwala bati bamaite oKibbumba neye ng’omu bibakola n’engeri egibeebityamu balagira nakimo ng’owebamwegaana. Bakoli b’ebya muliko era bajeemu; tibasaanira mulimo omusa waire gumo.

2

Enjegyeya entuuce

¹ Neye iwe Tito, oyegesyenge ebyo ebyabirana n’enjegyeya entuuce, nga oomwo niimwo omuli: ² Okwegesyanga abasaiza abakulu babbenge bantu abateeki omu biseego, n’abebawa ekitiisya, n’abeegendereza,

era abatuukiriire omu kwikirirya, n'omu kutaka, n'omu okuguminkiriza. ³ Abakali abakulu bona obeegesyenge otyo. Babbenge n'empisa egisaanira abantu ba Kibbumba, nga tibasibirirya oku banaabwe, era nga tibagalama b'omwenge. Bali n'okwegesyanga bintu ebisa, nga kwoteekere okwebityanga ng'ekyokuboneraku, ⁴ kaisi beesyenge okwegesya abakali abankafumbirwanga okutakanga abaibaabwe n'abaana baabwe. ⁵ Obeegesyenge okubba bantu abeefuga, n'ababulaku akamogo. Babbenge bantu abakola okusani emirimo omu bisito byabwe, era abeegendereza, n'abakuuma ebyama by'omu nyumba. Era babbenge tibalendi, abamaite okutuukirirya emirimo gyabwe omu kisito, era abagondera abaibaabwe, kaisi awo abataikirirya oYesu bakayenge awokusinzirira okuzumirira ekibono kya Kibbumba.

⁶ Abaisuka bona obalaabbirenge okubba abeegendereza. ⁷ Era iwe wena onyere, oli n'okubba kyokuboneraku omu byoyegesya na mu buli kintu ekyokola, ng'oli muntu omucaati atayuugayuuga era owa mazima omu enjegesya y'enjikiriryayo. ⁸ Buli ekyotumula kiri n'okubba kituuce, nga mpaamu kibakunenya, kaisi oyo akyakanisya aswale olwa kutabba n'ekibbikibbi ekyatutumulaku.

⁹ Oyegesyenge abagalama okuwuliranga abasengwa baabwe, nga beefuda okubona ng'abasengwa baabwe babasiima mu buli kintu, era nga tibaakanisya basengwa baabwe, ¹⁰ ooba okubaibbaku ebyabwe. Balagenge abasengwa

baabwe bati bali n'obwesigwa obwizulye, kaisi abantu oolwo basiime enjegesya ya Kibbumba oMulokoli waiswe.

¹¹ Olwakubba oKibbumba yalagire ati w'ekisa eeri abantu bonabona, yatekerewo enzira ya kulokola buli moiza aikirirya. ¹² Era ekisa ekyo kitubbeera okwega okuzwa oku bintu ebitaweesyia oKibbumba ekitiisya n'amasanyu g'ekyalo, kaisi tubbe bantu abeegendereza. Era tubbe bantu abacaati abatayuugayuga, era abawa oKibbumba ekitiisya omu mulembe gunu.

¹³ Era tubbe nga buli kiseera tukuumiriire lunaku oolwo olwa suubi waiswe ow'enkabi, okwo nga niikwo okuboneka kw'ekitiisya okwa Kibbumba ow'amaani era oMulokoli waiswe oYesu Kurisito. ¹⁴ OKurisito yeewaireyo okufa okulwaiswe kaisi atununule omu bibbibibi byaiswe byonabyona, atusuce abantube abakenene omu myoyo, era abamaliriire okukolanga ebintu ebisa ebyataka.

¹⁵ Ebyo niiby o ebyobba oyegesyenge. Era owoobba ng'olaabba ooba ng'onenya abaikirirya bonabona aboolabirira, okikolenge n'obwezye bwonabwona. Tiwaabbangawo kadi moiza mwibo atwala ati ebibono ebyoyegesya tibikulu.

3

Okulungamyia abaikirirya

¹ Oyewukiryenge abaikiririrya omu Yesu ibo okuwanga ekitiisya abafugi n'ab'obwezye, era babagonderenge, era babbenge beetegeki

okukolanga buli kikole ekisa kyonakyona. ² Obasisiitire okutatumulanga bundi oku muntu kadi moiza, era beewalenge oyombo; nga balumirwa abantu bonabona. Era, bawenge buli muntu ekitiisya, ³ olwakubba swena abanyere eira twabbaire basirusiru, era bajeemu, era ng'atuli bagalama eeri okwegomba okubbikubbi n'amasanyu aga buli ngeri. Twabbaire b'eitima era abaizwire ensaalwa, ng'abandi batucaawire, era nga swena abananyere tucaawagana.

⁴ Neye oKibbumba oMulokoli waiswe, omu kutulaga ekisa n'okutakakwe okwatakamu abantu, ⁵ yatulokoire, tirwokubba n'ebikole ebisa ebitwakolere, wazira lwa kusaasirakwe. Yatulokoire ng'akolesya kutuwa bwomi obuyaaka oMwoyo oMweru obwaleetawo omu muntu owetwikirirya oYesu. ⁶ Omwoyo oyo niye oguyatuwaire n'omwoyo gumo ng'abita omu Yesu Kurisito oMulokoli waiswe. ⁷ Ekyo yakikolere kaisi atutooleku omusango atutukulye olw'ekisaakye, tusuuke basika b'ebintu bya Kibbumba, era nga tusuubira obwomi obutawaawo obuyatusuubizire. ⁸ Ekyo ekintumulaku kituuce.

Era ebyo ntaka obikakasirenge nakimo, kaisi abaikirirya oKibbumba beegumyenge kukola bikole ebisaaniire oKibbumba. Ebyo niibyo ebisa era ebigasa abantu. ⁹ Neye weewalenge empaka egy'ekisirusiru, n'okwakana oku bikwata oku nkalala gy'amaliina g'abazeiza b'abantu ab'eira, era n'oku bikwata oku Mateeka ga Musa. Ekyo kityo olwakubba ebiri ng'ebyo bibula kibibagasa, era bya bwereere.

¹⁰ Omuntu aleetera abainaye okwawukana, owoomulabulanga omulundi ogusooka, tete n'ogwokubiri, awo ng'omuzweraku nakimo. ¹¹ Ekyo kityo olwakubba obba okitegeera-butegeri oti omuntu owengeri eyo abba muntu akola ebibbibbi eyaliibire ebiseego, era ng'ebikolebye bimalire okumusalira omusango okumusinga.

Ebisembayo

¹² Owenalikusindikira Aliteema ooba oTukiko, oyanguwangaku okwiza egyendi omu kibuga ky'e Nikopooli ng'ebiseera by'ogumpunga n'okutambula nga kugosi bikaali okutuuka, olwakubba eeyo niiyo eginsalirewo okumalira emyeri egyo. ¹³ Okole kyonakyona ekyoyezya obbeere oZeena omukugu omu by'aMateeka ga Musa n'Apolo okwetegekera olugendo lwabwe, beezye okusuna buli kimo ekibeetaaga okukolesya omu lugendo oolwo. ¹⁴ Oyegesyenge abaikirirya aboolabirira beege okwekoleranga emirimo omu batoolanga ebibakolesya omu bwomi bwabwe. Tibaabbanga awo nga babula kintu ekisa kadi kimo ekibagasa abantu abandi.

¹⁵ Bonabona abali na nze bakusugiirye. Otusugirirye bonabona abatutaka, abetufaanana omu njikirirya.

OKibbumba akukwatirenge ekisa.

Endagaano Empyaka Omu Lugwere
Gwere: Endagaano Empyaka Omu Lugwere (Bible)

copyright © 2019 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

03698e2d-9c8d-5b1f-bc49-b0066e860180